

易差遣故外任文臣甚多今後請令吏曹斟酌擬差何如傳于政院曰
以此言于吏曹儒生事亦言于禮曹成均館○臺諫啓前事不允○戶
曹啓曰常平倉穀今年已糶二千石賑給矣但聞貧民無縣布故豪富
之家冒名受米雖曰賑給實惠未及貧民云然亦可以加給也但兩界
入送軍糧未捧之數合計五萬餘石而京倉之穀本不多故前者京畿
監司亦請以京倉米賑救而三四月尤爲飢餓之時賑給事已受教今
請姑勿加給依前受教施行傳曰知道○己卯 御夕講○臺諫啓前
事不允○庚辰 聽啓覆○臺諫啓前事不允○夜東方南方有氣如
火○辛巳臺諫啓前事不允○壬午全羅道觀察使柳灌馳啓道內全
州等十二官物故人數九百十六名傳曰其依忠清咸鏡兩道例遣醫
藥致祭事言于禮曹○臺諫啓前事不允○御夕講○夜西方有氣如
火○癸未 御朝講○傳于政院曰禮曹正郎李英俊其依臺諫所啓
筭差○御夕講○臺諫啓前事不允○日暈

三月甲申朔○乙酉下書于京畿觀察使申鐔曰今因卿啓知南陽境
內癘氣侵染死亡者百有七人予甚驚愕今後物故內良賤分辨馳啓
且今下送醫員藥餌多般措置救活○丙戌臺諫啓前事不允○丁亥